

歷代職官表

冊六

欽定歷代職官表卷六十九

王府各官表

史	長	三代秦漢
		後漢三國晉
	長史	宋齊
	長史	梁陳
	長史	北魏
	長史	北齊
		後周隋
	長史	唐
	長史	五季宋
	長史	遼
	長史	金
	長史	元
	史府內	明

參軍
長史司馬司馬

散 騎 郎

護

尉

典

儀

僕

郎中
令郎中
衛士
長衛士
長衛士
令郎中
魏中
令郎中
典衛
令典衛
令典衛
令典衛
令典衛
令典衛
令典衛

典衛典軍

典軍

護衛
指揮
司

文學

典儀
衛

中尉中尉中尉中尉中尉中尉中尉

府屬參領

佐

領

驍 騎 校

[illegible]

[illegible]

王府各官

國朝官制

親王府世子郡王府長子長史各一人

正三品

貝勒司儀長一人

正四品

掌總府中之政令率僚屬以各共府事員額並順治八年定乾隆十八年奏准諸王長史貝勒司儀係首領官若僅於所屬官內簡補恐有遷就嗣後員缺於下五旗前鋒護軍驍騎各參領及世職官與所屬應陞人員簡擬正陪送部引

見補授凡王府以下各官自五品以上出缺引

見補授六品以下咨送兵部補授

散騎郎親王府四人世子郡王府三人長子二人

掌佐長史理府事皆以世職領之初制每旗各設散騎郎無定員雍正四年定制各王屬下散騎郎仍舊選充貝勒貝子等散騎郎俱停止

護衛親王府二十人

一等六人從三品二等六人從四品三等八人從五品

世子十七人

一等六人二等六人三等六人

郡王府十五人一等六人二等四人三等五人長子十五人一等四人二等三人三等六人貝勒十人二等六人三等八人

四貝子六人公四人俱三等護衛

掌隨護宿衛王府護衛自二等以下均帶藍翎初制為正品乾隆十九年

護衛典儀俱改為從品

典儀親王府六人從四品二人從五品二人世子五人從四品一人從五品各二人郡王府四

人從五品從六品各二人長子三人從五品二人從六品一人貝勒三人從五品一人從六品二人貝子三人從六品一人

人從七品一人從八品二人公三人從七品一人從八品二人

掌儀節導引

五旗王公府屬參領旗各五人從三品佐領旗各七人從四品驍騎校每佐領下一

人從六品

掌王府所屬旗籍之政令凡田賦戶口出納盈縮之數綜其實而稽之

管領親王府四人郡王府三人正六品

掌王府文移及遣委之事

典膳親王府一人郡王府一人從六品

掌王府之膳羞

司庫親王府二人郡王府二人從七品

掌會計王府之庫藏

司匠親王府四人郡王府四人從八品

掌王府繕造修葺之事

牧長親王府四人郡王府三人從八品

掌王府之牧事親王府馬羣牧長二人牛羣羊羣牧長各一人郡王府馬

羣牛羣羊羣牧長各一人

歷代建置

謹案三代時封建諸侯列國皆設官分職以治其民其法制備見於經傳兩漢晉宋諸侯王之官亦皆國官也宋齊梁陳以至隋唐諸王有府官有國官然兩漢以降王公率無分土所謂國官者乃虛名耳至宋置

府官而國官不設亦變通之道宜然也我

朝所設王府各官因事制宜劑繁簡而協於中其官名職掌有在昔本爲
府官者有在昔爲國官而今王府亦設之者亦莫非斟酌損益以適乎
古今之宜也

三代

〔周禮天官〕太宰乃施典于邦國設其參傅其伍陳其殷置其輔

〔鄭康成注〕參謂

卿三人伍謂大夫伍人殷衆也謂衆士也王制諸侯上士二十
七人其中士下士各居其上之三分輔府史庶人在官者也

謹案太宰職設其參置其伍參謂參卿伍謂伍大夫是侯國無論同異
姓皆得設三卿五大夫然周初封同姓諸侯其設官之盛如左傳定四
年祝佗曰分唐叔懷姓九宗職官五正注云五正五官之長疏云殷時
爲五行官長襄二十五年傳自六正五吏三十師注云六正三軍之六
卿蓋晉初封國已立五正故其後增至六正也是周初建同姓之國其
設官或不止參卿矣明堂位虞氏官五十夏后氏官百商二百周三

凡四代之官魯兼用之然則魯建官職且得同於王朝漢同姓諸侯王設官之盛蓋本周制也然當時諸侯君國子民卿大夫以下皆以分理一國之事其規制與今日王府官本自不同今第錄周禮太宰職以誌緣起而並不以著於表云

秦未置

漢

〔漢書百官公卿表〕諸侯王國有太傅輔王內史治國民中尉掌武職丞相統衆官羣卿大夫都官如漢朝景帝中五年令諸侯王不得復治國天子爲置吏改丞相曰相省御史大夫廷尉少府中正博士官大夫謁者郎諸官長丞皆損其員

謹案百官公卿表謂天子爲置吏改丞相曰相卽後漢志云國家惟爲置丞相御史大夫以下皆自置之是也漢紀宣帝詔膠東相王成治有異等其秩二千石隸釋三公山碑頌云願明公垂恩罔極保我國君洪

氏謂以明公稱山之神國相爲國君東海廟碑有東海相南陽桓君山陽滿君蓋漢自令諸侯王不得治國國相實專司國政其職與太守無異故國除爲郡則以國相爲太守郡建爲國則以太守爲國相並非兩官漢稱太守爲府君故碑有國君之稱耳又百官公卿表載中尉掌武職漢舊儀載中尉與王相爭權常不和考荀悅前漢紀載梁王以公孫詭羊勝爲中尉號將軍蓋中尉掌武職故得將軍之名蓋將相權相抗也又百官公卿表謂內史治國民成帝時省內史更令相治民漢紀載元鳳元年戴王薨後宮有遺腹相內史不以奏本始元年廣川王去有罪內史相劾收責之以此知相與內史凡事皆相濟故相可以兼內史之職也

〔後漢書百官志〕皇子封王其郡爲國每置傅一人相一人皆二千石本注曰傅主導王以善禮如師不臣也相如太守有長史如郡丞○中尉一人比二千石本注曰職如郡都尉主盜賊郎中令一人僕一人皆千石本

注曰郎中令掌王大夫郎中宿衛官如光祿勳自省少府職皆併焉僕主車及馭如太僕本注曰太僕比二千石武帝改但曰僕又皆減其秩治書比六百石本注曰治書本尙書更名大夫比六百石本注曰無員掌奉王使至京師奉璧賀正月及使諸國本皆持節後去節謁者比四百石本注曰掌冠長冠本員十六人後減禮樂長本注曰主樂人衛士長本注曰主衛士醫工長本注曰主醫藥丞巷長本注曰宦者主宮中婢使祠祀長本注曰主祠祀皆比四百石郎中二百石本注曰無員○侯國每國置相一人其秩各如本縣本注曰主治民如令長不臣也但納租於侯以戶數爲限其家臣置家丞庶子各一人本注曰主侍侯使理家事列侯舊有行人洗馬門大夫凡五官中興以來食邑千戶以上置家丞庶子各一人不滿千戶不置家丞又悉省行人洗馬門大夫

〔漢紀孝惠紀〕改諸侯王相國爲丞相〔景帝紀〕初諸侯得自除吏御史大夫以下官屬擬于天子國家惟置丞相黃金印自吳楚反之後奪諸侯

權爲置二千石去丞相曰相銀印其後惟得衣食租稅而已貧或乘牛車時欒布有功封欽侯爲燕相有治迹民爲立生祠中元三年罷諸侯王御史大夫官〔元帝紀〕令諸侯相位在郡守下

〔洪适隸釋司隸從事郭究碑〕竹邑者侯國屬沛南和者鉅鹿之邑漢列侯大者食縣置相一人其秩各如本縣主治民如今長爾高陽令楊著碑曰漢王國相則秩二千石侯國相纔與令長等耳思善者汝南之小國碑首題以高陽者叢爾國不若壯哉縣也

〔王應麟玉海〕漢諸侯王官有廩長私府長中御府長食官長常侍長史治書

謹案漢諸侯王國設官爲備有表志所不載而散見於紀傳者如路溫舒爲廣陽私府長龔舍爲楚王常侍馬宮爲楚王長史又廩長見王尊傳食官長見梁王襄傳尙食監見馮唐傳又史記淳于意爲齊太倉長而齊有中御府長信亦見意傳又宋書百官志云前漢王國已置文學

亦兩漢表志之所未載也漢初參用封建之法諸侯王地大人衆備設

衆官以治國事與三代時列國無異其後諸侯王不得治民王國之官

員數品秩並加減損又皆朝廷爲置不得自置晉宋以降所置王國官

大率沿漢制而增損之今國官旣廢而府官之護衛典儀典膳實卽漢

時王國郎中令衛士長僕及食官長之職也又漢時王國有長史與今

王府長史名同然漢王國置相職與郡太守同其長史卽郡丞之職今

王府長史乃沿宋齊以後府官之名與漢之王國長史名同而實異矣

〔玉海〕爲太傅者韋孟唐生於楚賈誼於梁夏侯始昌於昌邑轅固於清

河師丹彭宜慶普於東平韓嬰於常山伏理於高密戴德於信都丁姓於

中山鄧彭祖於真定衛綰於河間杜林於東海

疆封東海王重選官屬以林爲傳時諸王傳或多交

游惟林有召必至

何敞於濟南爲相者曹參石慶於齊董仲舒於江都膠西張敞

於膠東王尊於東平褚太於梁孔霸於高密內史則梁之韓安國楚之何

武中尉則昌邑之王吉淮陽之韋元成王式爲昌邑王師以三百五篇諫

吳王濞傳有太子師傳河間獻王立毛氏詩左氏春秋博士高帝時諸侯得除內史以下漢獨爲置丞相梁孝王以至親故得自置相二千石傳寬爲齊右丞相或者侯國亦有兩相乎漢興諸王侯皆自治民聘賢楚三聘龔舍爲常侍東平憲王辟林撫爲西曹掾尋以爲師友

三國

〔杜佑通典〕魏定制凡置王公侯伯子男六等有保傅相常侍侍郎郎中令太尉大農文學友謁者大夫雜署令丞

晉

〔晉書職官志〕王置師友文學各一人景帝諱故改師爲傅友者因文王仲尼四友之名號改太守爲內史省相及僕有郎中令中尉大農爲三卿大國置左右常侍各一人省郎中置侍郎二人典書典祠典衛學官令典書丞各一人治書四人中尉司馬世子庶子陵廟牧長各一人謁者四人中大夫六人舍人十人典府各一人